



Senin, 26 September 2022

Ogen: Roma 10:17



Megiken Berita



Uga ngenda prosesna kita erkiniteken? Adi si uri i bas kitik-kitikta nari, kita ibabai orangtua ku sekolah minggu, i je kita iajari rende, ertoto ras ngoge kata Dibata. E maka ituriken kerna kata Dibata man banta. Ertina kita ibabai lako megiken kata Dibata. Seh asa genduari pe lalap iajarken man banta gelah megiken Kata Dibata subuk arah kebaktin minggu ras kebaktin sideban. Teptep kebaktin enggo pasti lit i je ngoge ras nuriken kata Dibata. E maka adi tutuslah kita reh ku kebaktin siniaturken gerejanta enggo me rusur kita megi kata Dibata.

Payo bagi si ikataken Paulus, kiniteken rehna arah megiken berita e, janah isi berita e e me kerna Kristus. Megiken e dem alu ketutusan, konsentrasi, seh turah pengangkan si payo kerna Kristus e. La cukup cuping si megiken berita e tapi pusuh ras perukuren. Kenca ibegiken cuping iteruskenna berita e ku bas pusuh perukuren, i je me ingan tading kata Dibata e.

Rikut ras perkembangan jaman enda, uga nge genduari ketutusan ateta megiken berita kerna Tuhan Jesus e? Adi siperdiateken berita-berita i bas televisi, pembunuhan sesama rekan kerja terjadi, pembunuhan suami istri ras anak enggo melala, pelecehan seksual ras perselingkuhen enggo biasa, anak-anak umur 12 tahun iperkosa anak umur 25 tahun. Korupsi si lenga pernah bersih seh asa genduari. Adi si nen maka enterem si eragama Kristen pelakuna. Si begiken dengalah kata Dibata e entah agama e terjeng topeng si nutup-nutupi cunghikta si la payo. Lanai lit mela tupung tereteh ngelakoken kejahatan. Tempa kerina e enggo biasa, lanai lit teridah beban moral. Entah begiken nge kata Dibata e tapi lanai ringan i bas pusuh perukuren. I je begi, i je ka lupa. E maka labo lit kuasaNa i bas pusuhtha. Labo lit ngaruhna ku bas prilakunta.

Moria si ikelengi Tuhan, i tengah-tengah kesibuken si melala, lit min si aturken waktu lako megiken kata Dibata e, alu dem ketutusan ras konsentrasi. Pindo rusur Kesah Si Badia ngajari ras mereken pengertin man banta seh maka turah kiniteken si mbages i bas pusuh. Kiniteken e tuduhkan me arah sikap, perbahanen ras pendahinta si teptep wari.